

11/01/1999

DPMM sokong pelantikan TPM

DEWAN Perniagaan Melayu Malaysia (DPMM) mengalu-alukan pelantikan Datuk Seri Abdullah Ahmad Badawi sebagai Timbalan Perdana Menteri dan Tun Daim Zainuddin sebagai Menteri Kewangan seperti yang diumumkan Perdana Menteri, Datuk Seri Dr Mahathir Mohamad, dalam satu rombakan Kabinet Jumaat lalu.

Timbalan Presiden DPMM, Datuk Abdul Rahman Maidin, berkata pelantikan itu tentu berupaya memantapkan lagi kepemimpinan Perdana Menteri dalam usaha membawa negara ke tahap lebih cemerlang dalam alaf akan datang.

Katanya, kedua-dua tokoh itu mempunyai kekuatan serta pengalaman luas dan lama dalam bidang masing-masing. Kekuatan serta pengalaman itulah yang amat diperlukan untuk memacu negara ke mercu lebih tinggi.

"Datuk Abdullah seorang yang tinggi keimanan, tebal kesabarannya, serta halus budi bicara dan Tun Daim pula seorang tokoh yang tinggi disiplinnya, teliti kerjanya, gigih dan gagah menghadapi cabaran."

"Rekod beliau memulihkan ekonomi negara pada 1986 tidak dapat disangkal. Kini ekonomi negara menunjukkan tanda pemulihan sejak Tun Daim menerajui Majlis Tindakan Ekonomi Negara," katanya dalam satu kenyataan, kelmarin.

(END)